

Xajon ra ma-ni jò ra tsikínda jè Juan

Kjotsjacha kò kjohixi

¹Jì ndí chjoón ra xá jahíjin-li Nainá, kò jñà ixti-li, tíbindá-la xajon rakì 'an ra xita jchínga 'mì-na ya ingo. Ra ngi koó inìma-na tsjake-no, mì tsa ta 'an jiàan ra tsjake-no, tì'koaá tsjakeé-no nga'tsi jñà ra ijye be kó'sín tjín kjohixi. ²Kíí kò'sín tsjake-najiòn, ta ngatjì-la nga ijyeé nda tjíjin ya inìma-ná jè ra ngi kjoakixi, kò yaá kíjnajin ki'ta skanda ta mé nichjin-ni. ³Nainá ra Na'in 'mì-lá kò jè Jesucristo ra tjína ítjòn-ná ra I'ndí-la Nainá ma, katatsjá-no kjonda, katahimake-no, 'nchán katasíkijna ya ajin inìma-no, ra ngi kò kjohixi-la kò kjotsjacha-la.

⁴Taxki tsja ki'se-na 'kia nga kíjtsexkon i'ka jñà ixti-li, nga 'koaá 'sín inchisíjchá ijo-la koni 'sín nga tjín kjoakixi 'tse Nainá, koni 'sín nga ijye tsatéxoma-ná jè Nainá ra Na'in 'mì-lá. ⁵'Koaá 'sín tíbitsá'ba-no 'ndí 'ndí jìòn ndí 'ndsé ra 'ñó matsjake-no, nga machjeén-ní nga 'ñó tsjacha 'sieén xàngieé nga jngó jngó-ná. Nga mì tsa kjotéxoma xitse-jìn ra tíbindá-najiòn, tijé-ni jè kjotéxoma ra itjábé-ná skanda tì'sa tjà'tsin-la kjoa. ⁶Kíí 'sín tjín ra a'ta 'tse kjotsjacha, jé-ní nga 'koaá 'sín sīhitjasén koni 'sín tjín kjòn kjotéxoma-la Nainá, ijyeé ina'yé nga tì'sa 'ñó kjotseé kó'sín tíchja kjotéxoma. Nga 'ñó machjeén nga tsjacha 'sieén xàngieé nga jngó jngó-ná.

Xita ra kondacha

⁷Nga kjin ma-ni xita ra tjímasòn nga tjíngo isà'nde ra inchikòndacha-la xita, nga tsò: “Mì tsa 'én kixi-jìn nga kò'sín kitsin Jesucristo nga xita kjomà koni ra jíén.” Jè xita ra kò'sín

tsò, ta tíkondacha-ní, kò jé-ní jè ra tíjna ítjòn nga kondra fì-là Cristo. ⁸Nda tìkindaa ijo-no, mé-ni nga mì kì sìjchija-no jè kjòtjò ra tjábé-no a'ta 'tse xá ra ìnchi'nià. Nga machjeén-ní nga katatjábé ijye-no jè chjì-là xá ra ìnchi'nià.

⁹Nga'tsì xità ra batonè-là koni 'sín tjín 'én ra tsakón-ya jè Cristo nga xìn ndiyá kjábé, mì tsa Nainá tíjnakò; tanga jè ra kixì tíjna nga kò'sín tí'sín koni 'sín tsakón-ya Cristo, yaá tíjnakò Nainá ra Na'in 'mì-lá kò jè ra I'ndí-là ma. ¹⁰Tsa 'kia jngo xità kijchòjkon-no ra mejèn-là nga 'én-là Nainá 'keènajmí-no, tanga tsa mì kò'sín bakón-ya koni 'sín tsò 'én ra 'tse Cristo, kì ni'ya-no nìkjaha'sen kò kì 'mì-la: “Tijni.” ¹¹Nga jè ra tsjá'nde-là nga sìkja'ha'sen ya ni'ya-là, tì'koaá yaá tísingàsòn-kò kjòbìtsjen-là kò jñà xità ra ta kjoandiso tìbakón-ya.

'Én ra fehe'ta-ni

¹²Tjín jchán-isa mé 'én ra mejèn-na nga koxín-najiòn, tanga majìn-na nga tà xajon ki'tá-no. Jè ra mejèn-na nga íjkon xátí-no. 'Kiaá isa nda jchìbé mé-ni nga ngàsòn ngáya kata'se-là kjòtsja inìma-ná nga'tsí-ná. ¹³Jñà ìxti-là chjoón tichji ra tì'koa xá jahíjin-ni Nainá ìnchisíkasén-li 'én nga síkjáya-li. Kò'sín katama.